

Compra di cas pa Museo Aqueologico **Un proyecto fantastico cu ta parce di a keda stancá**

ORANJESTAD - Den diferente oportunidad, Bon Dia Aruba a haci referencia na necesidad urgente, pero impotancia tambe, cu pone nos museo arqueológico den un edificio mas adecuado, unda e reliquianan arqueologico, cu ta un tesoro nacional, por haya un lugá merecí.

Mayoria di pais di mundo ta conta cu un museo bon cuidá, den bon condicion, y cada pieza cu ta testimonio histórico, ta wordo mantení y resguardá hopi mes. Na Aruba, e mihó proyecto, e mihó esperanza cu tabatin pa cu nos museo, ta parce cu no a pasa di ta un ilusion, o un sueño cu a desparcé ora tabata parce cu e lo bira real. Un herencia valioso pa nos futuro generacion lo por bai perdí si autoridadnan concerní no ta pone un cuota di amor pa e aspecto aki. Tur pais ta cuida su historia. Aruba sigur, no por keda atras.

Ayera mainta Bon Dia Aruba a tuma contacto cu Sr. Evelino Fingal, Director di Instituto di Cultura di Aruba. Nos kier a puntré kico a para cu e proyecto excelente cu tabatin pa adkirí e cas di famia Ecury pa nos museo arqueológico, loke tabata algo fabuloso y digno pa hiza nos

nivel cultural, y pa ofrecé nos turismo e cara histórico di Aruba. Grandi tabata nos sorpresa ora Sr. Fingal a comentá cu durante un conversacion reciente cu e tabatin cu representantenan di KABNA, na Hulanda el a bisé cu Gobierno Hulandes NO a aprobá e financiamiento pa compra e cas aki, pasobra Gobierno Arubano a bisa cu nan mes ta bai financiá e proyecto aki, siendo cu autoridadnan locala indicá cu ta KABNA ta bai financiá e proyecto, cual por cierto ta uno fantástico.

Hulanda a duna Aruba un cantidad di mas o menos 50 miyon florin pa desaroyo, pero e suma aki no ta conta pa cultura. Asina nos a tende di Sr. Fingal, kende a muestra na su stem, un descepcion enorme, y a indicá cu pronto e lo bai tuma contacto cu e representante di KABNA na Aruba, pa mira kico ta kico, pa despues acercá gobierno pa mira kico ta bai pasa cu nos museo.

Manera nos a sinti Sr. Fingal su voz, nos ta sigur cu el a sinti hopi duele di e asunto aki, ya cu e ta ripará cu te ainda, aspecto cultural ta kedando un banda, siendo cu e ta un parti vital di tur sociedad cu tin un nivel di educacion alto.

No por papia di un educa-

cion completo si tur expresion cultural no ta forma parti di dje. Pero no ta solamente esaki.

E valor di e trabao di nos arqueológonan ta bai perdí si nan no tin un lugar adecuá pa mantené tur pieza u obheto antiguo, cu a wordo hayá y cu lo por ser encontrá.

Cada obheto, cada pieza, ta papia di Aruba, ta Aruba mes, ta un bida anterior sin cual esun actual y esun futuro no tabatin raiz.

Cu tin hopi hende interesá riba nan origen ta bisto. Nos columnanan Aruba y su Raiznan, e Indjanan di Aruba, mescos cu esnan tocante e fam y escudo di famianan Arubiano ta captando hopi atencion den nos comunidad.

Ainda nos ta corda e cantidad di comentario cu nos a haya día cu nos a publicá cu tin 100 sitio arqueológico na Aruba. Nos ta completamente bon parti di nos comunidad, kier mira nos museo destacá, y admirá pa e bishitantenan, pero tambe nos mes hende.

E proyecto aki no por bai perdí. E generacion di relevo cu ta creciendo caba den un ambiente cultural mas amplio, lo bai reclamá dia di mañan si nan lo no conta cu un museo adecuá, y nan lo tende cu hopi reliquia histórico a bai perdí. □